

2018. godina



BUDŽET za građane

Dragi sugrađani,

predstavljamo vam “Budžet za građane 2018.” Općine Stari Grad Sarajevo i nadamo se da ćete zahvaljujući ovom dokumentu ubuduće imati jasniji uvid u način planiranja, prikupljanja i trošenja budžetskih sredstava. “Bužet za građane” ima za cilj da vam na jednostavan i razumljiv način pokaže kako se raspoređuju budžetska sredstva, te da putem njega pratite realizaciju postavljenih ciljeva. Ovaj dokument pomoći će vam i da razumijete koje su to nadležnosti koje općina, kao jedinica lokalne samoprave ima, kao i koje su to oblasti za koje izdvajamo značajna sredstva iako ne spadaju u našu nadležnost. Razlog zbog kojeg to činimo je da bismo vam omogućili što kvalitetnije uslove života i olakšali vam svakodnevnice.



Od prvog dana mog dolaska na poziciju načelnika Općine Stari Grad Sarajevo trudio sam se da se prema trošenju budžetskih sredstava, ali i njihovom prikupljanju, odnosim kao i u svom vlastitom domu, da razumno trošimo i ulažemo novac, ali i da raspoređujemo na način da uvijek imamo dovoljno. Budžet jedne institucije i njegovo raspoređivanje ne razlikuje se puno od kućnog budžeta. Kako planirate i raspoređujete, tako i imate. Planiranje i raspoređivanje budžeta nije nimalo jednostavan posao, pogotovo u sredini kao što je naša, kada su zahtjevi i očekivanja mnogo veći od realnih mogućnosti. “Budžet za građane” pokazat će vam i koliko je teško odlučiti se o prioritetima koji će se u njemu naći, ali istovremeno će vam pokazati i na koji način Vi, kao pojedinci, možete biti uključeni u kreiranje budžeta i dati svoj doprinos. Priliku za to imate već u osmom mjesecu kada budžetski korisnici podnose našoj Službi za finansije zahtjeve za narednu godinu, a kroz te zahtjeve mogu biti ispoljene i potrebe građana koji djeluju putem NVO-a i udruženja. Šansa koju ne smijete propustiti je javna rasprava na Nacrt budžeta Općine Stari Grad koja može trajati od 15 do 30 dana, a kada u pisanoj formi možete dati sve svoje prijedloge nadležnoj službi. Oni će biti razmotreni i uvršteni u budžet u razumnim granicama. Uvijek vam na raspolaganju stoje i naše mjesne zajednice koje su vaša direktna veza sa Općinom i kojima je posao da prenose vaše zahtjeve i želje. Kreiranjem budžeta na ovakav način pomoći ćete i nama da utvrdimo prioritete i ono što je građanima uistinu najpotrebnije. U konačnici, vaše aktivnije uključivanje u budžetski proces rezultirat će kvalitetnijim upravljanjem lokalnom zajednicom.

Vaš načelnik,

mr.Ibrahim Hadžibajrić

ŠTA JE BUDŽET ZA GRAĐANE?

Budžet je ključni instrument pomoću kojeg Općina provodi svoju politiku u djela. Godišnji budžet je obično veoma kompleksan dokument koji je teško razumljiv velikom dijelu javnosti i upravo zbog toga ovaj dokument treba građanima pomoći da razumiju budžet. Nije najvažnije da budžet bude dostupan javnosti, već je podjednako važno da budžet bude pristupačan i razumljiv. Budžet za građane predstavlja jednu vrstu pojednostavljenog budžetskog dokumenta čija je osnovna karakteristika da je kreiran tako da bude dostupan i razumljiv većem dijelu populacije.

Dokumentom koji je pred vama nastojali smo da kroz slikovite tabele, grafikone i dijagrame prikažemo prihode, rashode, javni dug, raspodjelu sredstava po projektima, oblastima itd.

Budžet Općine je jednogodišnji dokument, kojeg priprema načelnik u saradnji sa općinskim službama/sektorima, a usvaja ga Općinsko vijeće. Budžet ima karakter finansijskog plana Općine za jednu godinu i predstavlja prognozu, ali je i više od toga: odredbe budžeta su obavezujuće za općinske organe na rashodovnoj strani i predviđeni izdaci se ne bi smjeli prekoračivati bez rebalansa budžeta, odnosno bez izmjene budžeta po istoj proceduri po kojoj je donijet. Sadržaj budžeta obično čine razvijeni spisak prihoda i rashoda,

zajedno sa njihovim planiranim iznosima za sljedeću godinu, kao i pratećim odredbama. Način na koji je formulisani budžet jednog organa uprave većini građana je nejasan i nerazumljiv. Iz tog razloga radi se tzv. Budžet za građane koji možete naći u mnogim razvijenim zem-

Budžet - Kraljeva kesa

Riječ “budžet” potiče od stare francuske riječi za malu kožnu torbicu. Kasnije se značenje promijenilo, pa je ista riječ označavala kraljevu kesu, odnosno biti plaćen iz budžeta značilo je dobiti novac iz kraljeve kese

ljama, a na mala vrata ulazi i u BiH.

Budžet za građane je svojevrsni izvještaj predstavljen u pristupačnom formatu, koristi jednostavan i jasan jezik koji građani mogu razumjeti. Ako su u stanju da razumiju, građani onda mogu ostvarivati svoja građanska prava u demokratiji, postavljati pitanja koja osiguravaju da vlast objašnjava ono šta radi u njihovo ime.



KO FINANSIRA POJEDINE NADLEŽNOSTI?

Općina Stari Grad Sarajevo, kao jedinica lokalne samouprave u FBiH, obavlja poslove iz samostalne nadležnosti i poslove koji su joj preneseni posebnim zakonima i propisima. Uzimajući u obzir cjelokupnu ekonomsku situaciju, općina se u određenoj mjeri uključuje u finansiranje projekata i davanje pomoći pojedinim kategorija-


ma stanovništva, koji nisu u direktnoj nadležnosti lokalnih nivoa vlasti. U narednoj tabeli prikazane su oblasti koje Općina finansira potpuno, većim dijelom (zakonskim propisima podijeljena nadležnost sa višim nivoima vlasti), u određenoj mjeri (nadležnost drugih nivoa vlasti), ili koristi donatorska sredstva.

Učešće Općine u finansiranju	Potpuno finansira Općina (direktna nadležnost)	Uglavnom finansira Općina (podijeljena nadležnost)	U manjoj mjeri finansira Općina (nadležnost drugih nivoa vlasti)	Ne finansira Općina (donatorska sredstva)
Imovinsko-pravni i stambeni poslovi	X			
Zaštita okoliša i privreda (poljoprivreda, zanatstvo, šumarstvo, ugostiteljstvo)			X	
Civilna zaštita	X			
Komunalne i druge djelatnosti		X		X
Investicije		X		X
Urbanizam i prostorno uređenje	X			
Boračka zaštita	X		X	
Socijalna i zdravstvena zaštita	X		X	
Opća uprava (takse, matični ured i sl.)	X			
Obrazovanje	X		X	
Kultura i sport	X		X	
Lokalni razvoj i OCD	X			X

BUDŽETSKI PROCES I BUDŽETSKI KALENDAR

Budžetski proces se zasniva na analizi ostvarenja prihoda u proteklom periodu, procjenama ekonomske osnove, prioritarnim ciljevima i poslovima iz nadležnosti Općine Stari Grad, planiranim projektima i programima. Budžetski kalendar zasniva se na odredbama Zakona o budžetima FBiH, a u

og suficita, odnosno izvore za finansiranje budžetskog deficita, funkcionalnu klasifikaciju izdataka budžetskih korisnika, prihode i izdatke svakog budžetskog korisnika u skladu sa prihodima i izdacima, klasifikacije računskog plana, visinu tekuće rezerve koja ne može biti veća od 3% budžetskih prihoda bez primitka.



Općinskog načelnika i Općinskog vijeća Stari Grad Sarajevo. Aktivnosti, prema budžetskom kalendaru počinju već u februaru tekuće godine, kada se izrađuje informacija o ekonomskoj fiskalnoj politici za tekuću godinu i procjena kretanja za naredne tri godine. Već u martu svi budžetski korisnici dostavljaju prijedloge prioriteta za izradu Dokumenta okvirnog budžeta (DOB) koji se usvaja najkasnije u šestom mjesecu.

Služba za finansije budžetskim korisnicima dostavlja uputstvo za pripremu zahtjeva za dodjelu sredstava iz budžeta, rokove i ograničenja u pogledu potrošnje. Potom, budžetski korisnici dostavljaju zahtjeve za odobravanje rashoda sa planiranim iznosima, a na osnovu toga pristupa se izradi Nacrta budžeta.

Nacrt budžeta obavezno sadrži: detaljan prikaz javnih prihoda i rashoda budžeta, prijedlog upotrebe budžetsk-

ko vijeće i njegova radna tijela, političke stranke, odnosno Klubovi vijećnika, nadležna radna tijela Općinskog vijeća, savjeti MZ-a, građani i udruženja građana sa područja općine Stari Grad Sarajevo. Nacrt budžeta objavljuje se u dnevnim novinama i na općinskoj web stranici www.starigrad.ba. Primjedbe i sugestije dati tokom javne rasprave moraju se dostaviti u pisanoj formi.

Nakon završene javne rasprave, primjedbe i sugestije se sumiraju i eventualno ugrađuju u tekst Prijedloga budžeta. Prijedlog budžeta dostavlja se Općinskom vijeću na usvajanje. U ovoj fazi izrade budžeta postoji indirektna mogućnost učešća građana putem amandmanskog djelovanja vijećnika. Općinsko vijeće usvaja Budžet koji se potom objavljuje u Službenim novinama Kantona Sarajevo, a budžetski korisnici se obavještavaju o iznosima odobrenih sredstava.

februar	Služba za finansije priprema informaciju o ekonomskoj fiskalnoj politici za tekuću godinu i procjenu kretanja za naredne tri godine (trogodišnji nivo) – najkasnije do 15. februara
mart	Budžetski korisnici dostavljaju prijedloge prioriteta za izradu Dokumenta okvirnog budžeta (DOB) – najkasnije do 15. marta
maj	Služba za finansije priprema Dokument okvirnog budžeta (DOB) i dostavlja Općinskom načelniku – najkasnije do 15. maja
juni	Općinski načelnik usvaja Dokument okvirnog budžeta (DOB) – najkasnije do 30. juna. Po usvajanju, DOB se objavljuje na općinskoj web stranici www.starigrad.ba
juli	Služba za finansije izrađuje i dostavlja uputstva budžetskim korisnicima u pogledu pripreme zahtjeva za dodjelu sredstava iz budžeta, rokova za podnošenje zahtjeva, te ograničenja u pogledu potrošnje – najkasnije do 15. jula
august	Budžetski korisnici (službe i sektori) dostavljaju zahtjeve za dodjelu budžetskih sredstava Službi za finansije – najkasnije do 15. augusta. Kroz zahtjeve službi i sektora mogu biti ispoljene potrebe građana koji djeluju putem NVO-a ili udruženja građana
septembar	Općinski načelnik, Služba za finansije, pomoćnici načelnika i rukovodioci službi/sektora razmatraju procjene prihoda i zahtjeva za odobravanje rashoda budžetskih korisnika, konsoliduju i utvrđuju visinu sredstava za svakog budžetskog korisnika – najkasnije do 15. septembra
oktobar	Služba za finansije priprema Nacrt budžeta Općine Stari Grad Sarajevo i upućuje ga na usvajanje Općinskom vijeću Stari Grad Sarajevo. Moguće je učešće građana putem NVO-a i grupa građana, kroz dostavljanje zahtjeva vijećnicima ili radnim tijelima Vijeća. Općinsko vijeće utvrđuje Nacrt budžeta i upućuje ga u javnu raspravu u kojoj učestvuju: Općinsko vijeće i njegova radna tijela, političke stranke, odnosno Klubovi vijećnika, nadležna radna tijela Općinskog vijeća, savjeti MZ-a, građani i udruženja građana sa područja općine Stari Grad Sarajevo.
decembar	Nakon završene javne rasprave, primjedbe i sugestije se sumiraju i eventualno ugrađuju u tekst Prijedloga budžeta. Prijedlog budžeta dostavlja se Općinskom vijeću na usvajanje. Indirektna mogućnost učešća građana putem amandmanskog djelovanja vijećnika. Općinsko vijeće usvaja Budžet koji se potom objavljuje u Službenim novinama Kantona Sarajevo, a budžetski korisnici se obavještavaju o iznosima odobrenih sredstava

Tabalarni prikaz budžetskog kalendara, gdje su crvenom bojom naglašeni mjeseci kada se građani mogu uključiti u kreiranje budžeta i na koji način

KAKO SE PUNI BUDŽET OPĆINE STARI GRAD SARAJEVO?

Općinsko vijeće Stari Grad Sarajevo utvrdilo je Nacrt Budžeta Općine Stari Grad Sarajevo za 2018. godinu na 11. sjednici održanoj 26. oktobra, 2017. godine i uputilo ga u javnu raspravu do 30. novembra, 2017. godine.

Budžet Općine Stari Grad Sarajevo za 2018. godinu iznosi 15.756.000 KM.

PRIHODI

Planirani prihodi sastoje se od:

- poreznih prihoda 5.374.566,00 KM
- neporeznih prihoda 10.131.434,00 KM
- tekućih potpora 250.000,00 KM
- prenesenih sredstava 0,00

Porezni prihodi sastoje se najvećim dijelom od indirektnih poreza, poreza na imovinu i poreza na dohodak. Općina nema direktan uticaj na ostvarenje poreznih prihoda s obzirom da se oni prate i raspoređuju na višim nivoima vlasti.

Neporezni prihodi su najveći izvor finansiranja Općine i njih čine prihodi od imovine, naknade, takse, i prihodi od pružanja javnih usluga (prihodi od iznajmljivanja poslovnih prostora, zauzimanja javnih površina, rente, komunalne takse itd).


Tekuće potpore se uglavnom odnose na grantove drugih nivoa vlasti i namijenjeni su za finansiranje i sufinansiranje projekata od zajedničkog interesa i čine svega 4% od ukupno planiranih sredstava.

Prenesena sredstva iz prethodne godine odnose se uglavnom na osigurana sredstva za već ugovorene obaveze i počete kapitalne projekte iz ranijeg perioda, kao i sredstva civilne zaštite koja se realizuju u skladu sa posebnim propisima


RASHODI

Pored izdataka planiranih za obavljanje osnovne djelatnosti u skladu sa zakonskim nadležnostima, rashodi su planirani na osnovu ciljeva i projekata utvrđenih u Strategiji lokalnog razvoja Općine Stari Grad Sarajevo 2014-2018. godina, programima rada i na osnovu javne rasprave o Nacrtu budžeta.

Struktura prihoda budžeta



Struktura rashoda



KAPITALNI PROJEKTI PLANIRANI U 2018. GODINI

Kapitalni projekti su jedna od najvažnijih aktivnosti lokalne zajednice ukoliko je opredijeljena za izgradnju novih objekata i građevinske infrastrukture. Istovremeno, kapitalni projekti iziskuju i najveće sume novca i troše dobar dio budžetskih sredstava. Općina Stari Grad kontinuirano ulaže u izgradnju novih objekata, saobraćajnica, mostova, sportskih sala, sistema vodosnabdijevanja i kanalizacije i u tom pravcu će nastaviti i u 2018. godini.

U 2018. godini bit će implementirana četiri kapitalna projekta čija je ukupna vrijednost 13,333.000 KM. Riječ je


o projektima:

1. Izgradnja i opremanje parkinga, općeg višenamjenskog prostora u ulici Avdage Šahinagića (podzemna garaža)
2. Izgradnja i opremanje sportske dvorane Osnovne škole „Edhem Mulabdić“
3. Obnova zgrade Općine Stari Grad Sarajevo („utopljanje“ objekta)
4. Završetak i opremanje Doma zdravlja Stari Grad (nadogradnja Doma zdravlja).

Novac za implementaciju ovih projekata obezbijeden je kroz kreditna sredstva Fonda za razvoj Kraljevine Saudijske Arabije.

REDNI BROJ	NAZIV PROJEKTA	VRIJEDNOST PROJEKTA (KM)
1.	Izgradnja i opremanje parkinga, općeg višenamjenskog prostora u ulici Avdage Šahinagića	6,844.500,00
2.	Izgradnja i opremanje sportske dvorane Osnovne škole „Edhem Mulabdić“	2,155.500,00
3.	Obnova zgrade Općine Stari Grad Sarajevo	1,944.500,00
4.	Završetak i opremanje Doma zdravlja Stari Grad	2,388.500,00
UKUPNO		13,333.000,00

Najznačajniji kapitalni projekti planirani za 2018. godinu dati su u tabelarnom prikazu.



IZDVAJANJA IZ OBLASTI OBRAZOVANJA, KULTURE I SPORTA

Za izdvajanja iz oblasti obrazovanja, kulture i sporta u 2018. godini planirana su sredstva u iznosu višem od 840.000 KM.

Iako Općina Stari Grad nema nadležnost nad obrazovanjem i obrazovnim institucijama i njihovo finansiranje je u nadležnosti Kantona Sarajevo, ipak se na godišnjem nivou izdvajaju značajna sredstva u obezbjeđivanju što povoljnijih uslova učenicima i nastavnom osoblju za njihov rad i boravak u školama. Osim toga, Općina Stari Grad stipendira izrazito nadarene učenike i studente sa svog područja, kao i učenike/šegrtke koji se odluče za izučavanje starih i deficitarnih zanata. Stipendisti se biraju na javnim pozivima koje Općina Stari Grad raspisuje u periodu oktobar/novembar kalendarske godine. Visina mjesečne stipendije iznosi 120,00 KM za studente i 80,00 KM za učenike.

Pružna se podrška radu institucijama kulture, kao što su Narodno pozorište, Pozorište mladih, Kamerni teatar 55,

Muzej Alija Izetbegović i druge, kao i kulturnim manifestacijama poput Sarajevo Film Festivala, Festivala Bašćaršijske noći, Javnog dočeka Nove godine itd.

Navedenim sredstvima finansira se i održavanje brojnih školskih takmičenja i turnira, te održavanje škole plivanja i škole skijanja za starogradske osnovce.

Općina Stari Grad, u cilju uključivanja osnovaca u sportske aktivnosti i podizanja svijesti o potrebi bavljenja sportom kod najmlađih, već nekoliko godina organizuje lige u fudbalu, odbojci i šahu, za što se također izdvajaju značajna sredstva.

Kroz planirana sredstva u budžetu finansiraju se besplatne užine za osnovce koji potiču iz porodica slabijeg materijalnog stanja, a za učenike koji žive u naseljima gdje nije uspostavljen ili je neredovan gradski saobraćaj, na osnovu sporazuma sa kantonalnim Ministarstvom nauke i obrazovanja, obezbjeđuje se alternativni prevoz.

REDNI BROJ	NAZIV PROJEKTA	NACRT BUDŽETA U 2018. GODINI	% U ODNOSU NA UKUPAN BUDŽET
1	Prevoz	287.000	34,11
2	Grant školama	147.000	17,47
3	Stipendije	95.000	11,29
4	Grant institucijama kulture	89.000	10,58
5	Socijalna inkluzija	60.500	7,19
6	Grantovi za manifestacije od značaja za kulturu	38.000	4,52
7	Poklon đacima prvacima	35.000	4,16
8	Sufinansiranje sportskih projekata	20.000	2,38
9	Grant za školu plivanja	15.000	1,78
10	Grant za zimovanje	15.000	1,78
11	Školska takmičenja	13.000	1,54
12	Lige osnovnih škola	10.000	1,19
13	Tekući transferi vjerskim zajednicama	7.000	0,83
14	Inkluzija kroz kulturu i sport	5.000	0,59
15	Grant kategorisanim sportašima	5.000	0,59
Ukupno		841.500	100,00

Tabelarni prikaz izdvajanja u oblasti obrazovanja, kulture i sporta.

IZDVAJANJA ZA BORAČKO-INVALIDSKU I SOCIJALNU ZAŠTITU

Planirana sredstva za izdvajanja iz oblasti boračko-invalidske i socijalne zaštite u 2018. godini iznose 885.000 KM.

Za redovnu djelatnost boračkih organizacija Općina Stari Grad godišnje izdvaja 100.000 KM.

Na godišnjem nivou izdvaja se 200.000 KM za stipendije učenicima i studentima iz šehidskih porodica i porodica palih boraca, RVI i demobilisanih boraca. Osim toga, finansira se nabavka školskog pribora za djecu iz boračke populacije, te izdvaja grant za odmor i ljetovanje članova boračke populacije.

U oblasti socijalne zaštite, sredstva se raspoređuju na grant-

ove humanitarnim organizacijama i javnim kuhinjama, jednokratne socijalne pomoći, pomoći za liječenje, troškove sekundarnog smještaja i smještaja bolesnih osoba itd.

Neke od adresa na koja se raspoređuju ova sredstva su Narodna kuhinja „Stari Grad“ kojoj se na godišnjem nivou dodjeljuje 40.000 KM, Merhamet za koji se izdvaja 15.000 KM, Crveni križ 20.000 KM, Udruženje penzionera 40.000 KM, itd.

Za podjelu jednokratnih pomoći povodom Bajrama, Dana Općine i Dana šehida godišnje se izdvaja 60.000 KM. Ove godine je za jednokratne novčane pomoći i grant za porodilje ukupno planirano 190.000 KM.

REDNI BROJ	NAZIV PROJEKTA	NACRT BUDŽETA U 2018. GODINI	% U ODNOSU NA UKUPAN BUDŽET
1	Stipendije za djecu boračke populacije	200.000	22,60
2	Grantovi humanitarnim organizacijama i javnim kuhinjama	115.000	12,99
3	Socijalna pomoć za liječenje građana, jednokratna pomoć osobama oboljelim od celijakije, grant po osnovu zdravstvene zaštite lica	115.000	12,99
4	Jednokratna socijalna pomoć i ostali grantovi pojedincima	100.000	11,30
5	Grantovi boračkim organizacijama za redovnu djelatnost	100.000	11,30
6	Grant za porodilje Stari Grad	90.000	10,17
7	Grant pojedincima za Dan Općine i Dan šehida	60.000	6,78
8	Centar za unaprjeđenje i promociju zdravlja	45.000	5,08
9	Grant Fondu za šehidska mezarja	40.000	4,52
11	Nabavka školskog pribora djeci boračke populacije	10.000	1,13
12	Grant za odmor i ljetovanje članova boračke populacije	10.000	1,13
Ukupno		885.000	100,00

Tabelarni prikaz izdvajanja po oblastima za boračko-invalidsku i socijalnu zaštitu

INVESTICIJE I KOMUNALNI POSLOVI

Oblast investicija i komunalnih poslova dijelom je obrađena u poglavlju "Kapitalni projekti" gdje su navedena najveća planirana investiranja/ulaganja u 2018. godini.

U oblasti komunalnih poslova planirana su značajna sredstva za sanaciju infrastrukture i osiguranje što boljih životnih uslova građana Starog Grada. U 2018. godini planirano je 780.000 KM za asfaltiranje i sanaciju ulica, postavljanje horizontalne i vertikalne signalizacije, 200.000 KM za

sanaciju kaldrma, 700.000 KM za sanaciju vodovodne i kanalizacione mreže, 130.000 KM za potporne zidove, rukohvate, klizišta itd.

U planu je i postavljanje kanti za selektivni otpad, izgradnja novih niša za smeće, uređenje javnih površina, sanacija javne rasvjete, uređenje i održavanje Aleje ambasadora.

U ove dvije oblasti, u 2018. godini bit će uloženo 2.502.000 KM.

REDNI BROJ	NAZIV PROJEKTA	NACRT BUDŽETA U 2018. GODINI	% U ODNOSU NA UKUPAN BUDŽET
1	Asfaltiranje i krpjenje ulica, postavljanje horizontalne i vertikalne signalizacije	780.000	31,18
2	Izgradnja i rekonstrukcija vodovodne i kanalizacione mreže	700.000	27,98
3	Zimsko održavanje ulica	250.000	9,99
4	Popločavanja i kaldrme	200.000	7,99
5	Kante za selektivni otpad, niše za smeće, uređenje javnih površina, slivnici, rešetke i poklopci	165.000	6,59
6	Potporni zidovi, rukohvati, odbojne ograde i putni odbojnici	130.000	5,20
7	Treća faza rekonstrukcije ulice Safvet bega Bašagića	130.000	5,20
8	Izgradnja, sanacija i održavanje stambeno-poslovnih i vjerskih objekata, numerisanje kuća	57.000	2,28
9	Sanacija javne rasvjete	50.000	2,00
10	Uređenje Aleje ambasadora	30.000	1,20
11	Video nadzor nad javnim površinama	10.000	0,40
Ukupno		2.502.000	100,00

RASPODJELA SREDSTAVA CIVILNE ZAŠTITE

Civilna zaštita organizuje, priprema i provodi zaštitu i spašavanje ljudi i materijalnih dobara na području općine Stari Grad Sarajevo, izrađuje procjenu ugroženosti lica, objekata i zemljišta na području općine, predlaže plan zaštite i spašavanja od prirodnih i drugih nesreća itd.

Namjenska sredstava civilne zaštite prikupljaju se temeljem posebnog poreza za zaštitu od prirodnih i drugih nesreća utvrđenog u Zakonu o zaštiti i spašavanju ljudi i materijalnih dobara od prirodnih i drugih nesreća. Općine sredstva za zaštitu i spašavanje mogu koristiti **isključivo** za namjene koje su utvrđene u Zakonu o zaštiti i spašavanju i to:

- opremanje, obučavanje i rad službe civilne zaštite općine
- pripremanje, opremanje, finansiranje i obuku općinskih štabova civilne zaštite, službi zaštite i spašavanja, operativnog centra i jedinica civilne zaštite koje organizira općina i povjerenika civilne zaštite općine, kao i troškove koji nastanu tokom njihovog učešća u provođenju mjera zaštite i spašavanja po naređenju općinskog šta-

ba civilne zaštite

- opremanje pravnih lica, u dijelu kada postavljene zadatke tim licima nadilaze njihove materijalne mogućnosti
- prilagođavanje i održavanje drugih zaštitnih objekata potrebama sklanjanja ljudi i materijalnih dobara
- nabavku i održavanje sistema za uzbunjivanje stanovništva
- saniranje dijela šteta nastalih prirodnom i drugom nesrećom, u skladu sa svojim materijalnim mogućnostima prema potrebi, pružanje finansijske podrške drugim općinama, a naročito za opremanje i obuku štabova civilne zaštite, službi zaštite i spašavanja, jedinica civilne zaštite, operativnih centara civilne zaštite i pomoć u saniranju posljedica prirodnih i drugih nesreća i mogu se koristiti za udruživanje sredstava posebne namjene sa općinama, kantonima i Federacijom, u zajedničkim projektima razvoja sistema zaštite i spašavanja
- druge potrebe zaštite i spašavanja, u skladu sa zakonom ili drugim propisima

REDNI BROJ	NAZIV PROJEKTA	NACRT BUDŽETA U 2018. GODINI	% U ODNOSU NA UKUPAN BUDŽET
1	Transferi za posebne namjene	231.200	41,13
2	Provođenje preventivnih mjera u skladu sa Zakonom o zaštiti i spašavanju	110.600	19,68
3	Opremanje struktura Civilne zaštite	100.000	17,79
4	Usluge rušenja objekata opasnih po građane i usluge zaštite od urušavanja ruševnih objekata	35.000	6,23
5	Klizišta	30.000	5,34
6	Usluge obuke i pripreme službi spašavanja Civilne zaštite	27.650	4,92
7	Troškovi učešća u provođenju mjera zaštite i spašavanja	27.650	4,92
Ukupno		562.100	100,00

Tabelarni prikaz raspodjele sredstava civilne zaštite u 2018. godini

LOKALNI RAZVOJ I PODRŠKA ORGANIZACIJAMA CIVILNOG DRUŠTVA

Lokalni razvoj Općine Stari Grad naslanja se na politiku utvrđenu Strategijom razvoja Općine 2014-2018. godine, te politiku razvoja i upravljanja prirodnim i turističkim resursima. Također, lokalni razvoj podrazumijeva i stalno ažuriranje, iniciranje i izradu projektnih prijedloga, te izradu programa kojima Općina aplicira prema domaćim i stranim donatorskim sredstvima.

Za organizacije civilnog društva ove godine je planiran grant u iznosu od 80.000 KM koji će biti raspoređen po utvrđenoj proceduri – LOD metodologiji.

U budžetu Općine Stari Grad za 2018. godinu za projekte zapošljavanja Sektora za lokalni razvoj planirano je 40.000 KM, a za podršku mladima 10.000 KM.

REDNI BROJ	NAZIV PROJEKTA	NACRT BUDŽETA U 2018. GODINI	% U ODNOSU NA UKUPAN BUDŽET
1	Projektne aktivnosti	105.000,00	41,67
2	Grantovi organizacijama civilnog društva	80.000,00	31,75
3	Zapošljavanje	40.000,00	15,87
5	Pojedinačni grantovi organizacijama civilnog društva	17.000,00	6,75
6	Mladi	10.000,00	3,97
Ukupno		252.000,00	100,00

Tabelarni prikaz raspodjele sredstava za lokalni razvoj i podršku organizacijama civilnog društva

IZDVAJANJA U OBLASTI POLJOPRIVREDE

Za podsticaj poljoprivredne proizvodnje u Starom Gradu u 2018. godini planirano je 88.000 KM. Izdvajanjem ovih sredstava nastavit će se trend podrške razvoju poljoprivredne proizvodnje u ruralnim dijelovima općine kroz donaciju plastenika, podsticaj stočarske proizvodnje, pčelarstva, voćarstva itd.

I 2018. godine u planu je podjela plastenika, kao i košnica sa pčelarskom opremom, stočne hrane, sadnog materijala za plastenike...

Kroz projekat "Razvoj stočarstva u Starom Gradu" nastavit će se podsticanje razvoja govedarstva, ovčarstva, kozarstva, ribarstva i peradarstva u najstarijoj sarajevskoj općini.

REDNI BROJ	NAZIV PROJEKTA	NACRT BUDŽETA U 2018. GODINI	% U ODNOSU NA UKUPAN BUDŽET
1	Ratarstvo	35.000	39,77
2	Stočarstvo	20.000	22,73
3	Ekološki projekti LEAP i hortikulturno uređenje	15.000	17,05
4	Stimulisanje poljoprivredne proizvodnje	8.000	9,09
5	Pčelarstvo	5.000	5,68
6	Voćarstvo	5.000	5,68
Ukupno		88.000	100,00

Tabelarni prikaz izdvajanja u oblasti poljoprivrede



Budžet za građane Općine Stari Grad Sarajevo predstavlja jednu vrstu pojednostavljenog budžetskog dokumenta čija je osnovna karakteristika da je kreiran tako da bude dostupan i razumljiv većem dijelu građana.

Budžet za građane je dokument pisan jednostavnim i jasnim jezikom koji građani mogu razumjeti. Ako su u stanju

da razumiju, građani onda mogu ostvarivati svoja građanska prava u demokratiji i postavljati pitanja koja osiguravaju da vlast objašnjava ono šta radi u njihovo ime.

Pogledajte Budžet za građane, a u slučaju da je ostalo nešto nejasno i nedorečeno, kontaktirajte nas na dole navedene adrese.

Vaše primjedbe i sugestije možete dostaviti u pisanoj formi, najkasnije do 30.novembra, 2017. godine, Službi za finansije ili na dole navedene e-mail adrese.

Kontakt sa građanima:

Služba za finansije Općine Stari Grad Sarajevo
Edina Osmanagić, šef Odsjeka za finansije
tel 00387 33 282 342
e-mail: info@starigrad.ba i
edina.osmanagic@starigrad.ba
[Nacrt budžeta Općine Stari Grad Sarajevo](#)

IMPRESSUM

Izdavač: Općina Stari Grad Sarajevo
Pripremili: Tim za izradu Budžeta za građane Općine Stari Grad Sarajevo
Grafički dizajn: Safet Mališević

Sarajevo,

